

蒼梧縣志卷之八

建置志 下

樓閣 亭臺同

古大儒先憂後樂政成之暇不廢宴游選勝探奇騷人寄

與梧山環水抱名勝頗多創繼無聞亦斯邑之陋也

天一獨秀陽明白鶴大雲俱五門城樓明天啟閒巡按劉有源題名

棲鳳臺在城內舊總府會政廳後舊志會政廳改嶺表書院程文德作臺其上

據最高處

朗吟亭在城東阜民山下至元閒建通志內有呂巖像取

朗吟飛過洞庭湖句為名一統志明成化閒總督韓雍

蒼梧縣志 卷之八 建置志 樓閣

修舊志明屠浦記兩廣古百粵之地外接番夷內雜

皆以出羣之才膺總鎮之寄自蒞事以來寇盜殄除軍

民寧謐庶務畢張百廢交舉其事功之可紀者不一而

足蒼梧當兩廣之衝東南諸峰秀麗萬狀昔呂洞賓常

憩於此郡人遂構其上名曰呂仙亭不知何時創建洪

武以來屢有修葺之者至是復損壞宋公謂二公曰諸

廟貌之在祀典者皆聿新之矣此亭獨弗葺可乎二公

曰不可於是同心協謀儲材鳩工經始於成化二十二

年四月越一月而訖工警阿翬飛棟宇鳥革黝堊丹漆

煥然一新誠一方之偉觀也是年夏余奉命到廣東諸

公蒼梧來會暇日宋公過余言曰予與柳公等嘗重修

呂仙亭今已落成子盍記之余曰夫神仙遺世獨善者

也公等豈慕其術乎公曰否洞賓於吾君民嘗效靈非

他仙比元天歷閒時疫大作有張彥才者夢一道人求

庭前樟樹為洞賓像彥才許之時疫遂止今之像即此

木為之又有梁大用者世奉洞賓一日有老人來丐食

大用留之三日其人別去留白石一塊大用剖之得鐵

針三枚遇人疾病則針之無不驗者民賴壽考者多元

末仙之左手指間生靈芝一本狀如蓮花馨香馥馥襲

人未幾吾太祖高皇帝龍飛淮甸統有九有郡人以爲
瑞世之徵其功之載於典籍者如此亭之復修蓋爲是
耳夫豈慕其術乎余曰噫公等所見可謂大過人矣余
少時嘗讀晦菴先生感興詩有曰刀圭一入口白日生
羽翰我欲往從之脫履諒非難但恐逆天理偷生詎能
安遂疑神仙可以學而至及見古今人學黃白之術往
往傾家蕩產竟無所就如漢武末年之悔是也始知神
仙不可以學而至晦菴之意蓋以生死爲常經偷生爲
逆理故立此言以警後世非決然以神仙可學也今公
等不慕其術而重其功其所見豈不大過人也洞賓之
靈有在再福吾君民於億萬千年則斯亭修建之功將
與洞賓之功同垂不朽矣公別去余遂敘其巔末以爲
記 管大勳詩北風搖蕩江雲飛與客登山叩石扉寒
鴉枯木少人跡青蛇寶劍長八尺朝從北海過洞庭暮
掃蒼雲歸石壁吸盡三江無一滴坐看二儀自闔闢世
人滔滔名利閒不如遺落歸深山深山樂莫若仙家渴
時甘露飢胡麻與來醉卧松根石窟覺長天秋一
碧呀嗟呼呂仙呂仙何處尋環佩飄飄只朗吟 道光
二十二年知府糜良澤重修更名棲真樓 采訪冊

蒼梧縣志

卷之八

建置志

樓閣

二

奎星樓在迴瀾書院左知府李世孝建今遷文昌宮前

奎星閣在城北台山書院中一在長行鄉上二堡圓光山

一在多賢鄉思良江口二里下郢水口 同上

在水一方樓在準提閣前道光二十七年邑紳李百齡修

咸豐七年城陷燬於賊

怡翠閣在準提閣道光閒大守彭舒萼題額 同上

漫泉亭在冰井寺後唐元結建明正德十六年重修 通志

盛記漫泉亭在梧府城東二里冰井南初唐大厯閒容
州刺史充本州經畧使元公過泉上作冰泉銘貞元十
年監察御史章武重修之紹興中州守任通直叢石勒
爲雙井碑至銘之剝裂字猶存十之七八郡人趙善鄧
立之元廉訪僉事段茂又重立之天順六年王師有事
南徼師旋駐蒼梧維時盛與前軍都督僉事顏侯彪得

是并於莽蒼中重浚之其旁復得斷碑一角可辨識纔
數字元公官位名字獨存因命知府李璉主簿嚴鼎儒
士陳洙扶樹而亭覆之題今名漫泉云者漫叟公所自
稱也嗚乎元公天下士當時用不極而惟道州之政最
著使天下後世推之者無閒言曰元道州至不欲名字
之然則人有土地人民之寄可不知所以法於公者乎
公之文僅存片石閱歷數千百載屢仆而屢樹銘雖泐
而官不可蝕字幾盡而名不可泯非公之賢而能致是
乎古之人語言文字多矣如公之春陵賦及其神道碑
頌當時和者有杜甫氏書者有太師魯國公天下後世
家傳人誦獨至今不衰而公忠國愛民之心尤莫切於
道州聽壁記其顯而明有若爲當今言者謂人不可以類
文不因人而傳可乎蒼梧當二廣之衝大小命吏往還
京國多道出其下間爲刻辭於亭將使讀公之文求公
之政慕公之爲人有如公所謂徐李者夫彼不爲徐李
者知感發而懲艾焉則吾民庶幾其有瘳乎是宜泉以
漫名亭以漫泉名蓋又欲天下後世人皆知食人之
力而居人之上者有公也或曰冰井以厭郡火山或又
曰雙井泉高下異嘗得異人言分愈疾疫茲固不足究
已亭建於是年三月成於四月記作於是月二十四日

蒼梧縣志

卷之八

建置志

樓閣

其辭曰漫之泉兮在南州南州之人兮樂且無尤又亭
之翼翼兮泉脈窈酌泉清兮頰亭幽羌至止兮夷猶我
思昔人兮有賢漫叟泉有銘兮石有伍我昔求之兮寒
烟壤礎泉甘如飴兮亦潔如乳雲上升兮雨於下土賢
哉漫叟兮其誰可語我思古人兮維顏與杜吁嗟爾泉
兮曷究澤乎天下 袁衷漫泉亭賞花記樂者情之暢
也人情有七樂其一也凡居官處外久勞憂抑心疲神
倦不可不賞樂以舒其情故古者有休沐之賜范文正
亦日後天下之樂而樂維成化三年歲在丁亥夏五月
既望梧郡東郭之外漫泉亭前雙沼蓮花盛開越十有
九日適南寧二守天台蔡君廷白以公務留梧予因邀
之偕予同寅別駕文江毛君洪猷通判吳興金君廷玉
節推南充王君伯升與府幕諸君暨兩庠儒官合十有
四人會集於亭上列坐有倫飲酒有節市喧不聞肴羞
不冗藹乎和氣之交暢秩乎獻酬之有容酒半酣分韻
賦詩陶然共樂廷白曰是會不可以無記屬筆於予嗟
乎漫泉梧郡佳勝也自唐大歷三年容州刺史充本州
經畧使元公次山過泉上始作冰泉銘宋紹興閒州守
任通直贊泉爲雙井以厭火山虐焰或云以是泉之治
列如冰可分愈疾疫因號曰冰井天順六年皇師出靖

蠻寇凱旋弭節蒼梧巡撫兩廣兼理軍務都憲崑山葉公偕都督顏公訪尋遺跡得是泉於莽蒼中復重浚之題曰漫泉蓋漫叟元公所自稱也都憲葉公易冰泉爲漫泉是蓋欲天下後世皆知食人之力者存心愛民有元公也乃命構亭於雙井之陽鑿二方池於井之前以蓄其分流歷歲既久始積而清冽淵深而浩衍今年春三月十有六日子因政暇過漫泉亭上觀二池之清湛可愛命寺僧汝意采藕遍栽於池中方兩閱月而花爛然開豔清香馥馥周於漫泉之上維時暑雨初霽薰風徐來人意和暢遂成歡賞疇昔宋韓魏公出守廣陵值芍藥花開有奇香者特選客具樂以賞之今漫泉賞蓮之會客皆同寅儒官非用選也斯文雅會非絲非竹不具樂也不選客不具樂無非所以感仰聖天子仁均四海時和歲稔政務休暇宴集賓僚而同樂太平者也宴酣之樂賡韻迭和聚文字之歡無管絃之雜是卽韓子所謂樂而不失其正又樂之尤者也梧人與是賞者鄉貢進士李廷鳳陳欽寺僧道嗣汝意也陳洙漫泉亭賦并序漫泉唐元子漫叟所銘冰泉也去今七百餘年泉涇銘石廢亦其宜矣然銘字盡泐獨元子官名兩存若冥護然者吁亦異矣哉今御史大夫崑山葉公重元

蒼梧縣志

卷之八

建置志

樓閣

四

子仁政箴有官君子以啟迪民教作廢而易名蓋非細故也公又紀文於石而亭覆其上洙爲之賦義無他則亦同歸於賢賢元子而申儆在位焉耳其辭曰天與貞良七葉中唐合聞合望漫叟漫郎繫大厯之初載駐玉節於南荒諭蠻酋而王化洽綏八州而民事康爰顧以瞻曰此邊土政雖少紆俗或未煦乃駕輜車乃歷險阻乃采風謠以問疾苦於時蒼梧東瀛水北地關關元脈溢泱泱涓涓盈盈澆澆注醴泉之芳溶溜石髓之香液滙六月之甘寒儲兩涵之深碧挹之而杯勺冰漸漱也而齒牙霜刺清飈颯兮淒容湛月霽其流魄斯姬潔於簷帷又鑑榮於榮戟心爾醒兮澄源熱斯濯兮疏澤於是俯而嘆仰而興泆休泳美命名曰冰伐堅貞於星魄繹雅思以鑄銘穹龜負兮屹屹蟠螭紐兮亭亭麗林谷兮鳳鸞翥燭天壤兮奎章明雖星移以物換愈境勝而地靈火山畏滋而收焰疾疫飲潤而攸寧石累廢而累植卒燉燉於遐齡聖明盛世用賢致理盡嶺海之瘡痍出弼丞之德履豸冠兮峩峩繡衣兮煒煒曰撫曰巡於泉泣止莽四瞻兮就涇碑一角兮無幾洗蝸篆於蘇青別剟文於苔紫固皆殘蝕之餘僅存官名於元子噫吁嘻殆天乎哉光有唐而欽庶位表楨幹於賢才擷忠貞

而偃蹇庇民物而勞來耿遺文之光燄恍誦讀以增懷
今復全名於毀石夫豈人力之能為矧於泉固休澤之
儼在抑茲州而又仁愛之所遺忍置焉而不治於以慰
遺黎之永思乃鳩而工乃斲而木爰葺爰營紀勒貞玉
易漫於冰兮人政之潔浮於泉系泉以亭兮蓋因泉以
覆茲屋庶登斯亭也曰元子也仁明之牧而觀斯泉也
昔冰寒於水今冰凜於人寧不凜煩洗熯引後兮光前
所係兮匪獨敦民教兮警士風夫豈適觀遊兮而於斯
取錄亂曰有唐元子賢也哲兮世皆溷濁性獨潔兮受
命南綏駐玉節兮嗜甘泉寒曰冰冽兮刻以銘詩溥莫
竭兮後百千年石殘缺兮不有君子澤其替兮易名覆
亭匪遊資兮爾古爾今民兀陞兮契仁於斯庶呼咥兮
凡百有官佩章曳兮履亭誦文嚙冰滌熱
兮豈惟泉時溲兮去吾民憂永忘悒悒兮

挹清亭在漫泉亭後山嶠之陽明正統閒建通志又舊志

天順六年總督葉盛建名覽勝亭

鳳皇亭在冰井山上通志後有拱日亭舊志程文德拱

蒼梧縣志卷之八建置志樓閣五

孤亭酌萬里同懸拱日心莫道
浮雲能久蔽從來天際有餘陰

北望樓在城內北茶山巔康熙二十五年知府陳天植建

府志

漾月亭在城東負東山跨鱷池水光山色映照左右輿地紀勝

嘉魚亭在子城西輿地紀勝江濱丙穴出嘉魚故名通志

傳若金嘉魚亭詩舟楫回沙驛旌旂駐郡亭江通五管
白天落九疑青此日瞻雲氣誰家見客星軍需晝夜急

寇盜幾
時寧

高明亭在城北慶林寺卽韓襄毅四角亭陞邑人馮承芳

建通志明程文德記皇明嘉靖甲午歲春三月二十
日松谿程子送客出梧州城北過龍母廟十步許有

山徑折而東見馮子桂山精舍在焉亟訪之入門茅堂
數楹凡一書一侍兩生無長物時雷雨初霽山氣森然

而堂益清肅松谿子冷然而喜對公榻終日矣起而四顧江環山抱見其上有古刹曰慶林攝衣梯石偕登門殿荒涼佛像僅存殿左僧舍數椽出二僧癯癯壁宇蕭然亦無餘物塵心益洗立殿後草樹繁蔭鳥聲嘹唳視聽不厭桂山復指示山半有石洞可容十五六人惜路沒不得往予欣然命僕夫剪棘除道杖藜携酒而登至則俯殿宇如深窅中此身軒然雲霄上矣洞離向上如甕下如砥出欬擿足蹶蹶有聲持石擊之如伐大鼓予不覺駭且喜曰此洞烏得無名名石鼓允稱夫鼓以聲名昔石鼓擬形今石鼓擬聲則尤可傳也乃舉酒酌洞靈高歌相和題名洞門而出下山猶徘徊瞻顧踰寺外迄山左麓有舊亭陞至是則出幽邃登彝曠可以眺遠山俯長江桂山曰昔韓襄毅嘗亭於斯而今圯矣吾欲嗣葺之宜何名予曰此高明之位也名曰高明可乎桂山喜而謝曰諾予有感焉夫洞舊矣而表之自予夫亭圯矣而新之自予物之顯晦廢興誠有數耶吾昔備位史官今謫典信宜子為司徒尚書郎被逮家食而數則然吾與子又何往而不自得也若夫愛身明道修已俟時則不可一日廢昔賢有是言矣吾與子共勗焉暮色蒼然山風淒至爰復反精舍命酌少憩桂山謂今日之

蒼梧縣志

卷之八

建置志

樓閣

六

遊無期盡適良不偶也蓋記之松谿子乃秉燭述茲遊之巔末松谿金華程文德舜敷氏桂山里人馮承芳世也立

三友堂在城北明邑人馮承芳建

文載田汝成記桂山馮子治圃江孺環邱頰

壑尚肥遯之操復考槃之篇於是芟刈凡卉獨樹松竹梅三種種各一叢秀色青葱離立左右馮子時時撰策高詠其間日昃忘返嘗語人曰此吾三友也或曰異哉子之取友也鳥獸不可同羣而參之草木何居焉馮子曰嘻獨不聞古之人有米子元章見石輒拜曰此吾石友也夫石且可友而何異於竹耶松耶梅耶遂為堂於圃東顏曰三友復歌以落之歌曰惟松翹翹惟竹斯耦惟梅頡頏執我良友執我良友友節友貞友潔其英不歆不零霜雪崢嶸用考我德歲寒與盟田子聞之喟然稱曰善哉友也夫宏大觀者類物情以索義寓至言者遊方外以采真心有所超雖瓦甃可以語道是以君子脫畧形骸披領要眇然後澗溪沼沚之毛可以昭忠信舟卮几杖之器可以備箴規也若夫繕性取之佩韋治國資之牧馬運書興於舞劍論學演之斲輪皆能觸類

旁通緣情生覺何者有所悟者必有所資也何獨至於馮子之取友而疑之况夫友也者投分易而久要難故臭味不倫薰猶不可以並措愛憎所軋膠漆亦至於終渝視升沉為親疏擇枯苑以翔集嗚呼友道淪喪肇自衣冠憤激之言起於明哲是以翟公奮署門之筆劉生廣絕交之論也今馮子之取友也託物章義蔑勢利而泯炎涼以矯頹俗其能久要者歟脫畧形骸而超然方外其宏大觀者歟寓言於此而顯諷於彼其憤激者歟不然馮子行高而視下德盛而禮恭隱不違親而貞不絕俗久矣故體物不二則四海皆同胞取善不窮則千古可論世而顧肯淪跡邱園比伍草木耶馮子欣然日吾志也微斯言吾無以自解於世矣請書以為記

控粵亭在白鶴岡明成化二年冬韓雍建通志二首高亭徙倚

望西東兩鎮平分一水通諸將雄兵歸節制百蠻殘孽任牢籠陽回陰谷窮厓內人在光天化日中翹首何堪倍惆悵思鄉懷國此心同開府蒼梧構野亭旌麾駐此喜時寧全收百粵歸王化遙制諸番貢帝庭霜氣飛來江月白瘴煙消盡海天青丈夫有志堪輿內豈獨燕然可勒銘唐馮和韻詩蒼梧正界廣西東幕府亭開四

蒼梧縣志卷之八建置志樓閣七

望通敵愾雄兵鷹脫臂乞降殘寇鳥歸籠霞光半落青天外野色全歸綠樹中百粵干戈從此息喜看文軌一朝同王祐詩一亭突兀鎮梧山氛祲潛消氣概間玉帳宏開威令肅虎牙森衛鼓鞞閒坐招降寇分符去立待遊兵報捷還駐節此中勞控制不因風景漫躋攀

留雲閣在繫龍洲明都御史劉繼文創建萬曆四十六年知府陳鑑修後圯

國朝康熙二十四年左江道王毓賢知府陳天植復捐資增

建三十六年知府孫調鼎重修孫調鼎記粵西遠在天

衝志稱其地總百粵山連五嶺儼然一大都會也其山則有大雲金石其水則有鱷池冰井而其足以擅一郡之勝者則唯繫龍洲為最洲峙大江中流高不過卷石然當春夏霪潦怒濤洶湧一望汪洋唯此洲巍然未嘗湮沒故又名浮洲四方遊士登其巔而覽眺者以方之金焦諸勝良不誣已舊有閣建自明刺史陳公名鑑者

歲久頽圯余奉命來守蒼梧修廢舉墜治先其急既捐俸為葺文廟修義學比年以來庶事漸理嘗於簿書之暇放棹江流瞻顧形勢竊謂是洲控扼長江實為中流砥柱顧聽其樓閣棟宇敗壞弗修非所以壯金湯表巨麗也因復命工庀材仍舊趾而稍擴之歷級而登前有隙地砌以磚石垣皆玲瓏可以四矚中建閣以祀關帝廳亦四面閣下為堂可容數几堂之後又另構一室以為退居之所其室下左旁另置僧房廚竈命僧棲息以奉晨昏香火云既成余因率僚士憑高四望舉酒而告之曰嗟乎余之所以建此閣者豈徒侈遊觀而已哉余與若均為天子吏守此邦治此民凡民閱之休戚皆吾身之休戚也今日者見夫雉堞之嵯峨河山之鞏固何昔之生齒實盛而今則土滿而荒也凋弊之俗當思何以治之見夫絃誦之聲微科甲之登罕何昔之士行敦而今之子衿此儷也文教之隆當思何以振之見夫帆影參差桅檣上下此東西朔南貿遷有無皆往來於梧郡者也遠方之商旅當思何以柔之見夫兩岸之閒農夫牧豎荷笠披雲此兵燹餘黎皆賴吾起之溝渠而登之衽席者也窮簷之赤子當思何以保之凡吾所以觸之目而傲諸心者無非為斯土斯民之責若徒以

蒼梧縣志

卷之八

建置志

樓閣

八

侈遊觀之樂彼臨春結綺齊雲落星古且以萬乘之君不能長庇一宇不移時而化青燐白楊供後人之憑嘆而謂吾儕其祇以漫遊是好為耶故夫權歌漁唱浴雁飛鳧雲影天光一碧萬頃江間之景非不四時具備此蓋騷人墨客之所賞識吾願後之守斯土者勿視為遊觀之地而可已是為記

五十八年知府

范大士重修六十一年邑人李世瑞增修道光十三年

重修更名青雲閣咸豐四年為賊焚燬同治十年以形

家言建閣不利於紳宦改建印亭

喜雨堂在舊總督府行臺

通志 韓雍題行臺喜雨堂詩 尚凋弊所事惟田疇如何耕植時未見雨澤流地坼苗漸槁比屋聲啾啾且聞中原地旱亦傷來牟中原流徙多北寇懷奸謀一或歲大凶所在生百憂我忝大夫後與國同戚休德涼召時災恐懼當禱求聖主重民命祀神禮先修詔來臨海邦氣已潛通幽果然賜甘澤旬日遍九州枯槁咸回蘇百穀定有秋酷暑亦淨洗炎荒涼

鸞鸞聖德與天通民亦知所由兒童競鼓舞父老齊歌
誦小堂適苟完懽感惟我尤羣公携酒至且有新詩投
扁以喜雨名酌以黃金甌
我愧不能當題詩紀皇猷

閱江亭在平定橋南明萬曆三年總督殷正茂建舊志

邀月亭在城北鼓巖堂右舊志程文德登邀月巖詩今晨忽憶別家時萬里經年尚未

歸鄉國幾人懷合節天在此地共斜暉登高有興來乘月久客無家未授衣酒醒露寒人欲散山城燈火望依

微康熙五十五年邑人李世瑞作亭於月巖上

廣鎮亭在城北三台山又名廣鑑堂嘉靖閒都御史張臬建同上

君子亭即廣益堂舊址在城北三台山麓又名百花亭舊志

參通志有百字碑見金石明俞安期君子亭漫詠秋聲何處急悲笳一曲歌殘遍落霞獨坐長亭聽不盡滿

天風雨滴黃花

蒼梧縣志 卷之八 建置志 樓閣 九

愛民堂在州東東園輿地紀勝

樂山堂在郡圃同上

習隱堂在城東舊志

省心堂在城東北同上

迴瀾堂在城東門外環長隄前臨清流通明知府陳鑑建

浣清堂在東門外冰井寺前明成化時建後更名梧山第一

緇林閣在傳經書院中

松風閣在城內德清觀右俱同上

梓潼閣在府學東射圃北府志

南渡亭在火山麓康熙六十年邑人李世瑞建舊志李

亭記畧梧城南大江路達南五鄉明設關於火山之巔日鎮南江水泱泱一舟橫渡山之麓無鋪舍炎寒暑雨行旅無依余家上遊倚檻觸目心焉傷之爰造渡船以便往來捨渡頭珠璣巷地民居四十餘間年租十三兩有奇爲渡夫工食不收渡錢名曰南義渡更於南山麓建亭以爲行旅憩息之所工告竣適當重陽余喜觀厥成載酒作龍山之遊爰筆記之

祥光亭在城南冲霄山巔建無考道光五年修采訪邑人李端邦

記畧梧郡南岸冲霄山羣峰屏列如案爲梧名勝區昔賢於山巔建祥光塔又於半山建祥光亭明季改造眞武廟今南山觀卽其地基陞所遺六角牙磚宛然而邑乘缺載君子惜之道光癸未臘余因與同邑諸君子僉謀修復顛請張郡侯可其議越明年適重修郡邑兩翼宮幸有餘資遂捐吉典役自乙酉仲春興作越夏仲落成上下二層高三丈許其上爲閣作寶蓋頂壯觀瞻啟三月窗以舒憑眺數百年遺蹟一旦振興豈偶然哉爲顏其閣曰祥光新其製而猶襲其名亦仍舊貫之意也工成因敘次其畧於石碑後之君子有所稽焉

蒼梧縣志 卷之八 建置志 樓閣 十

石鏡亭在邀月巖前康熙五十八年邑人李世瑞建舊志

綠猗亭在白鶴觀右

望仙亭在長行鄉月洞邑人李喬木建舊志

印亭在多賢鄉思良江下鄧水口道光二十七年邑人李

懷舒倡建采訪

八角亭在吉陽鄉二堡鬱岡同上

坊表

記曰坊所以坊民之不足也忠孝節烈紀功揚名尙矣卽如致福致壽亦匪易得王者表厥宅里風聲所樹豈其微哉

天官坊在驛前街爲吏部郎中吳裕建舊志

洪武中吳裕舉孝廉科官至吏部郎中

司馬坊在德政門外爲兵部郎中龔篋建

永樂癸未龔篋領鄉薦登甲申會榮榜進士初合浙江

嘉定縣官至兵部郎中

光祿坊在西門外爲光祿卿李素建

蒼梧縣志 卷之八 建置志 坊表 十一

永樂甲午李素領鄉薦登甲辰刑寬榜進士官至光祿

寺卿

方伯坊在府學東爲布政使宋欽建

永樂丁酉宋欽領鄉薦入太學授戶部主事官至湖廣

左布政使致仕天順六年梧城陷死難

尙書坊在天官坊右爲吳清惠公廷舉建

成化庚子吳廷舉領鄉薦登丁未費宏榜進士初合廣

東順德縣官至南京工部尙書

金榜傳芳坊在城內塘基街爲進士石邦柱建

成化丙午石邦柱領鄉薦登宏治壬戌康海榜進士初

令廣東南海縣官至瑞州知府

冬官坊在方伯坊右爲工部員外郎李喬木建

正德丁卯李喬木領鄉薦初授潮州府推官官至南京
工部員外郎

三江鎖鑰坊在南薰門總督姚鏌建

嘉靖四年總督姚鏌進兵平田州岑猛建坊紀功

南門坊在南薰門外都御史韓雍建南曰蒼梧古郡北曰
百粵嚙喉

成化六年韓雍總督兩廣始設總府於梧州終明之世
皆爲永制以平大藤峽建坊紀功

蒼梧縣志

卷之八

建置志

坊表

六

蒼梧一勝坊在鼓巖堂前邑人李世瑞建題曰雲山毓秀
俱同上

康熙五十八年邑人李世瑞創鼓巖堂立坊紀勝

中流砥柱坊在城東元君古廟前

采訪

康熙六十一年知府李世孝修天后廟以梧江上怪石
岫嶙激川澎湃溯流者各具戒心感神之靈建坊門外
以壯觀瞻道光閒重修

節孝坊在節孝祠前

舊志

雍正四年奉文直省各州縣均準於節孝祠門外建坊
以新風化凡婦人年未三十而夫亡守節苦節三十年

已上及守節十五年而沒者地方官核實咨部給銀各家自行建坊其閨門貞女及壽母年登百歲亦一體給予建坊載在會典至各事蹟俱詳本傳

三尚書坊舊志云在府江上古欖村舊有尚書祠祠前建坊或疑爲龍編侯士燮按侯治尚書與其二弟又皆太守故云

貞烈坊在大雲門外爲舉人劉思聰妻莫氏建俱同上

節婦坊在南薰門外雍正九年爲舉人王地錕妻吳氏建府志

百歲坊在長洲鼓石坊乾隆八年爲唐守積妻李氏建

蒼梧縣志 卷之八 建置志 坊表 三

貞節坊在長洲中山乾隆十一年爲梁巨祚妻易氏建俱同上

貞節坊在多賢鄉思委都豪村乾隆三十三年爲生員蘇

汝榎妻覃氏建采訪

貞女坊在戎墟道光十年舉人馮志超爲姑秀瓊建

節孝坊在長行鄉河口埠道光十三年爲關耀緒妻黎氏建

節孝坊在城東鎖龍橋下道光十年爲區杰琦妻茹氏建

雙節坊在吉陽鄉廩村道光十九年爲秦君連妻鍾氏媳

莫氏建

貞壽坊在城內學院行署左道光二十年爲四川潼縣營
遊擊董君玉妻陸氏建

雙節坊在城內舊考棚街西道光二十九年爲生員嚴挾
妻李氏媳生員嚴啟運妻易氏建

俱同上

蒼梧縣志

卷之八

建置志

坊表

十四

佛寺

方外所棲多名勝之地藉以祝釐為我

皇上鞏萬年之基當今

聖學昌明其邪正是非姑不具論唯士大夫歸休退老得以遊

覽其中煮茗敲碁消遣世慮非海宇昇平何以有此

大雄寺舊名光孝即南漢感報寺在城東二里雲蓋山麓一統志

唐建宋元明俱重修通志明洪武十二年邑人侯佛銘

捨田在冠蓋鄉以供香火舊志

國朝順治十五年守道陳宏業修李本晟重修大雄寺記大雄禪寺為全梧香火碣籍

無存莫稽所始得之傳聞唐鄂國尉遲公所創也載考本利鐘銘有大漢乾和十六年鑄是後周顯德五年戊

蒼梧縣志 卷之八 建置志 佛寺 五

午也越宋元而明迄今七百有一年矣而香供仍殷胡亦山運佛法實憑依之今八月肆燄憲守陳君宏業祈澤立應觀敗瓦頽垣僅存數柱而佛像剝落無復莊嚴色相進寺而語之日滄桑迭改慈悲無壞其靈爽若茲但護法無人乃深古道傷心之感耳陳君隨發心願出牀頭涓穀旦庀材鳩工革朽鼎新且易楹奠礎悉以巧思代繁力不數月而傑構依雲金碧炫彩觀者驚為神助余曰不然人世大患為見有我見因有人見人我之見橫分慳吝之痴遂以隱據於中故見利不克興見害不克除文官則成愛錢之癖武官則患怖死之根饒有掀天揭地之才總成問舍求田之陋冀其破格標奇烏乎得故金剛六度特以佈施當慈航引登彼岸為立地破除不墮慳吝之苦海者有幾陳君以文武雙擅之質完太虛無我之心所歷不與人殊而所豎輒與人異按公筮仕始秦繼晉隨車膏雨遍及殘黎兩地頌甘棠者瀾翻盈耳帝嘉乃績僉憲永平未幾遷陽和又未幾遷潼關朝廷實以內邊之重鎮西郵之要區借公鎖鑰其地公抑豪滑清兼併駕馭其悍戾而噢咻其子遺遂使京輔左右奠如磐石保釐之化不且媿美東郊與唯蒼梧為百粵要地襟五嶺控兩粵榛莽初闢而狼氛鳩瘠類

頻入告用煩南顧復移公分守之公下車問民疾苦遍行賑卹嚴核諸州縣招流民督開墾悉合平價市牛以裕耕鋤迄今父老士女享桑麻安耕鑿伊誰賜歟乃八鎮分峙公密授方畧八醜藁首竄箐餘徒尙盤山谷公親帥輕騎探蒙茸冒矢石搗窮崖焚巢殲逆羣凶詫爲天威洗心瓦解鬱林博陸一帶隨獲寧宇猗歟休哉大約概公生平馭歷者非一地敷展者非一格而近述逃稽殆亦靡利弗興靡害弗除不怖死不愛錢所以樹之朝野皆光明俊偉之業則茲之重新古刹不托衲子之鉢不資素封之緡獨捐千鏹聿護淨土於以福庇斯民永全梧香火以無替亦卽其不落慳之一念無鉅無細隨事布露自行其常念之素耳豈有所標奇矜異於其閒哉由公歷宦之偉績合茲新寺之布施原本無我一而二二而一者也公號顯菴三韓人今爲東

郊迎春之所通志城東三里許雲蓋山下後爲水月亭

有南漢銅鐘見金石相傳爲唐鄂國公建舊志乾隆十二年重修

府志陸綸重修頭門金剛殿水月閣記梧郡有大雄古刹卽光孝寺肇於唐代爲祇林之法地久矣唐臣祠

蒼梧縣志卷之八建置志佛寺

宇近接如鄰準提高閣遙連爲脈晨鐘暮鼓禪梵之音相屬蒼柏有翠禽之集幽谿來馥郁之香斯奚不可以滌塵囂煩俗之襟而爲禪流棲寂之道場乎哉頭門三閒前殿三閒後山水月閣三閒規模宏敞體制適宜不知幾費經營而得落成也自唐以至於今上下千餘年屢經零落屢經整葺完替之感因時而生豈得以佛教本空遂可寬其繼嗣之責而非若堂構之必思負荷也風雨剝落簷瓦傾頽丹堊盡爲減色漢銅之響鑄高閣無聲迦座之輝光閒庭閒寂岌岌殆哉不免於廢墜之虞矣住持僧圓曦目擊心驚緣募相助鳩工尅期而竣將勒石以志求言於子紀績以垂久也書善以美施也凡皆得載於石者也因爲之記

冰井寺在東城外冰井側一統志唐建宋元重修府志明

成化七年修通志正德九年重建梅俊重建冰井寺記

志之大靈山重岡疊嶂綺縮繡錯山之扶輿蜿蜒奔馳峩矗南下其麓則延袤廣衍不閒丈而並出雙泉左濁右清在古刹中去城二里許說者以其泉脈屬兩廣信乎余嘗遊句曲山之玉晨觀見陰陽井冬夏二至氣升

蒼梧縣志

卷之八

建置志

佛寺

七

左右以冰井較之左之濁者脈通南海味鹹而温以其勢逆上流於秋冬必涸右之清者脈來桂江味甘而冷以其勢順下遡故四序不竭理或然也唐元道州過泉為銘刻石目曰冰井意厭郡南火山去今七百餘年銘石已廢元之壬辰御史章武逮我天順壬午都憲崑山葉公盛相繼修葺久亦寢敝成化乙酉兩廣蠻夷弗靖都御史吳郡韓公雍奉敕提兵剿滅當玉峽斷藤之後留公守鎮兩藩公乃章請特命開設總府於梧控制百粵正德癸酉欽命總鎮兩廣御馬監太監潘公以盜息民安干戈倒載乃商於總督右都御史三山林公舜舉總戎太保武定侯鳳陽郭公世臣曰邊蠻不生廢墜可舉冰井古刹誠為靈區歲久侵陵泉源涇塞飲水者忌焉遊觀者歎焉予欲修舉以利乎民不識可否二公咸可之公遂捐賜金構材植募匠工重為鼎建其所費不取於官不科於民凡民之就役者皆厚以工食謠曰潘公濬井梧民食水恩德治人深入骨髓靡不爭先趨赴罔有怠忽乃闢基高廣倍古中建佛堂三間金相莊嚴羅漢兩列巍擁龍牌於中祝聖壽也殿前為山門三間塑四大天王閑出入也就門翊繞迴廊各十二間抱合殿山中踊甃階階東西鑿地為沼遠師淨社襲清香也

殿北構堂三間題曰塵外風光備遊憩也堂東方又三間附以廚庫為籍僧之居堂西齋堂三間次以藏廁為遊客之館堂之後得雙井焉發砌方涵滌蕩澄澈便民汲也井北石磴逼峻而上重飾漫亭以集題咏之跡亭後再發十數級夷其巔更建觀音一閣以壓鎮火山閣之西北緣嶮至岫構亭一楹爽朗軒豁題曰拱日懷君象也閣之東北夾山中有塘長二百丈餘來雲山石峽之源瞰流再構一亭題曰挹清覽靈秀也塘南新墾腴地數畦蒔種三時之嘉蔬沼北舊有污池一方津注兩泉之餘瀝殿堂門廡紙爐碑悉塗以丹腹之彩墁以黝聖之工四隅周匝環築土垣煥然一新命僧圓芝常住於此以便焚修公尚慮無所恆給重出白金購田數十畝以助祝釐香燈之費寺外抵城東門路傍對植松檜有侍陰覆乎馳道樵蘇有林蔬食有圃作善之心詳且密矣工肇於是歲冬十一月庚寅日落成於明年春三月亦庚寅也予以太保公書聘來梧得接公友愛因命為記予惟天下之利莫水若也與其利以福蒼生固天下之人所願望仁人君子之所欲為者亦豈易致哉必俟大有為之才居大德為之位乘大可為之時斯利可與已之所欲為者遂人之所願望者成今公以內相之

賢總鎮兩藩是有大才而居大位矣方今粵草綠抽狼煙紅息公畧不陰已私乃大修舉則遺愛滌而流芳遠矣將見百世之下飲泉之人觀井興懷亦必有甘棠之頌豈獨元子專美於唐哉余復頌以偈云□出仁心可

是能果能因善善相仍諸公正萬曆二十七年稅監沈氣回雙井不待凝寒已到冰

永壽請勅重建時名殿堂宏麗有勅賜藏經樓通志

重修廣善寺記廣善禪寺在梧州郡城之東去城里許有大雲山亦名大靈山山有一隈僅數十畝後有流泉面陽積水成池出其東門舉目重巒疊嶂行至池頭始見寺門蓋叢林中之小巧隱逸者也寺中兩井相對深不盈丈左濁右清說者謂濁通南海味鹹而溫以勢逆上流秋冬必涸清脈來桂江味甘而冷其勢順下邇四時不竭此事之未曉者姑存而弗論唐元道州以郡南有火山因日冰井而寺遂名冰井云寺之廢興夏邑梅公俊序之詳矣余獨惟梅公之序以正德癸酉欽命總鎮兩廣御馬監太監潘公以盜息民安干戈倒載謂廢墜可舉欲修冰井以利乎民而制臺都御史林公舜舉總戎武定侯郭公世臣同詞為可潘公即捐金修之數

蒼梧縣志 卷之八 建置志 佛寺

語吁亦奇矣而猶未足多也當今天子御極之己亥歲命御馬監太監沈公永壽權鎮三江駐監梧地公清時多暇求所以報國裕民之術乃徧觀諸古刹首新冰井寺疏請於朝天子加其忠誠賜改寺額為廣善兼賜龍藏及論住持僧畧曰俾四海八方同歸仁慈善教朕成恭已無為之治焉大哉皇言非得精一真傳曷克臻此余思保衡者有言勿以善小而勿為素王亦曰在止於至善然帝王之為善與庸人異將以小善必為似乎善止一身及其止於至善又善合天下噫此正虞帝善與人同之妙也昔寺名冰井以利乎民上之人足稱善矣民之謠曰恩德及人深入骨髓下之人亦知善矣而猶未廣也自廣善之名立則民未嘗不利乎冰而四海八方同歸於止至善之地恭己無為而不見有善名寧獨區區一冰井之為乎昔潘公以御馬監鎮梧我公亦以御馬監涖梧潘公以盜息民安干戈倒載而修冰井我公亦以權鎮三江清時多暇而改冰井潘公者捐金購材鳩工而我公亦捐金購材鳩工上下百餘年間心若一人事若一轍此余之所奇也然公之超越乎前人者不在於是是在啟天語以廣善一號合天下萬世見皇上不惑於浮屠不沾沾於獨善而成帝王止於至善之學

又見我公之不汲汲於嬉遊娛樂絕無尋常內相態輔
皇上以止至善之治是宜急書之以志不朽至於大雲
山之隈僅容一寺殿宇亭閣之增損田疇蔬圃之廢置
別自有紀而豪強不得兼并惟御經閣在正殿之後勅
論碑在正殿之前較之唐宋以來尤為輝耀若右之清
井四序不竭久矣置之寺外與民同之非自今始也門
內雙井特美觀耳無容書吳光龍夏日遊冰井寺詩
瀟湘東折大江隈古寺深藏小徑迴白馬經函開石室
黃梅雨過遍蒼苔香供瓶水冰凝鬢錫卓雲林玉作臺
却証前身是佛還從摩詰問如來黃裳吉遊冰井
寺試茗詩為訪幽岑踏逕苔寒泉相對賞心開瓊花灑
灑隨風起玉液溶溶滴露來礪齒何人耽石漱知音有
客試茶杯名因漫叟傳芳潔仰止慚無作賦才龔文
選陪戴中丞遊鳳皇山招飲冰井寺詩躡磴攀蘿郭外
山翱翔千仞翠微閒峰前案擁清流玉嶺外雲生秀鎖
鬢世情偏到松巒寂古刹長看日月閒更喜名泉冰鑑
潔好探一勺洗塵顏戴耀和詩整日馳驅此日閒邀
君杖策叩禪關驚看檻外三江合喜對庭前一鑑寒玉
井梅橫冰掩映草亭雲斂鶴飛還明
年度歲知何地狂歌為爾一解顏

蒼梧縣志

卷之八

建置志

佛寺

九

國初定南王孔有德左翼兵拆取正殿大柱以去僅存後楹

舊志

乾隆十三年重修

府志 陸綸重建冰井寺記井

隅有蘭若室洄瀾映帶亭沼淵如其西北隅即為冰井
自唐經畧元次山有銘詞泉甘流冽遂與清風雅操相
照耀於蠻區荒壤而有寺以永其名聿為蒼梧之勝蓋
不同於凌雲之竇雙角之胥久矣殆今檐瓦傾頽堊丹
減色住持通存目擊情黯緣募於紳士村民復鳩工庀
材而整葺焉輪然奕然不減疇昔之幽趣而更加點綴
以成泉石山林之致元公之蹟不有因
寺而益傳者乎記之以垂永久可也

準提閣在城東阜民山麓明崇禎十四年知府袁文新建

舊志

文新準提閣記又日子曰人之於世知有人不

知有出也其入也如油入麪無有出時夫入則必有求
求則冀其得而孰知究竟無得人亦何樂而必欲入也
佛菩薩憫念眾生廣開方便以導其出夫出固於世無
求於世無得而奚必不求奚必不得如是求如是得殆
異乎人之求之也異乎人之得之也什氏諸經卷莫不

有顯密圓顯圓教言也可解而知密圓咒語也不可解而亦不必解但言受奉行而咒力宏深無求不得上焉者之求聰明求智慧次焉者之求功名求富貴求男女一任所求無不得也是何世人入世而求之無厭得之莫必一出世而奉佛持咒響應如斯之捷也微乎微乎神妙而莫可測功德而莫可思議者乎世尊憫念未來諸生而說七俱胝佛母心準提陀羅尼經咒以為道之易入者其惟準提秘密乎又日持之有年似覺悉隨心願即余自得家兒後向未舉子每自念一者之單忽不覺雲兒產於辛巳年季冬十有四日也則提斯咒之驗也私諸己不若公諸人而未得其便偶一僧得大木請鑄菩薩像又日曰準提乎兩越月而像成金身十八臂十分裝嚴惜無奉佛地一日登山而觀即不出仙祠之右一營卒之居也余方啟之而卒且慨然允之夫何以慨然允之也則先一日夢所居遍地皆手而不見人其準提之十八臂乎一時頓覺人心寬然踊躍而贊成者翁然矣起於辛巳年辛丑月癸丑日成於壬午年辛亥月乙卯日題其額曰準提佛閣此一閣也所坐者幽幽五嶺之雲所臨者秩秩三江之水所前列而四圍者縣縣亘亘一貼身之几案而趨趨踰踰踰踰一抱膝之龍虎也

蒼梧縣志

卷之八

建置志

佛寺

辛

美哉盤鬱蒼梧一大地乎壯哉結構西粵一巨觀乎梧之人民望斯閣而頂禮頂禮之未已而誦持誦持之未已而觀想佛必有以告我矣雖所求所得不出人世之中而求之得之超出人世之上也蓋出世者能轉世入世者為世轉而密圓於斯咒轉世之微妙吾不得而知之矣是佛說也請還而問之佛 覃朝選詩雨後侵春屐流鶯出苑糴瀾隄芳樹碧一路野花香人影遲蕭寺鐘聲度晚塘却看流水好小立石橋涼咸豐七年燬於賊任持僧靜雲募化鼎新邑人許懿林有記

養真菴在城南吉陽鄉石橋村萬曆四十三年知府張養

正建置田一百三十五畝 舊志

國朝康熙間知府黃龍修 府志

大慈院在城東放生池南東嶽廟左康熙三十五年埠商

孫際泰程尙彝建

紫竹菴在東嶽廟右

吉祥寺在城隍廟右觀音堂前雍正十年僧募建今毀

西來閣在城東南同治二年改建昭忠祠

寶塔寺在城東濱江

鼓巖堂在城北二里許石鼓洞山麓康熙五十五年邑人

李世瑞建

舊志

李世瑞鼓巖堂記畧郡城北二里許

若者乃捐金建佛院二進翼以兩廊命名曰鼓巖左設庖廚右作精舍前為門繚以垣外立坊題曰蒼梧一勝後建邀月亭石鏡亭凡石鼓洞邀月巖山中景以次修舉是役也經始於丙申初秋落成於戊戌仲冬棟宇煒煌金容煥彩鐘鼓器用無不備具置田於對岸兩埔立戶於在城一圖使僧之住持者主其計毋許私相售易即余子孫亦無得過而問之

前為慶琳寺舊址

韓雍留款慶林寺詩并序成化七年十二

蒼梧縣志

卷之八

建置志

佛寺

三

月十八日余與總鎮太監陳公總兵官平江伯陳公視耀武揚威關留欵慶琳寺寺前山陂之上其平如掌下臨長江旁列茂樹眾登覽為之躍然喜勝地之偶得而因念時事浩然興發作一詩書遺寺僧同遊者參議王孟育馮文綱也嚴關閣初遍下馬憩禪林樹覆連天幙泉鳴隔澗琴憂民成老疾報國喜同心聞道西征急何時聽捷鼓巖堂咸豐間燬同治十年世瑞元孫恒修復

太平菴城西二里許桂江西岸明時建

國朝順治間沈世治重修置業

觀音堂在北門外關廟左一在城隍廟右一在東嶽廟右

金蓮菴在城東雲蓋山麓光孝寺西

華嚴寺在長洲尾明創建萬曆四十六年重建

何趙壁記世尊豎大

明鏡照大千界觀音以三十二應入諸國土法輪常擁妙相莊嚴層層映入山河便是天眼世界即為法身是

以洪都巨鎮勝景名區莫不有琳瑯佛刹以點綴之諸
比丘權種人天之界永為福地之光惟茲長洲剖洪濤
而中峙勢若巨鼇赴大壑其前之托洲泗化等洲累累
若引導然四山擁衛眾水縈滙才人巨戶麟集其上誠
蒼梧之勝區也綿亘二十餘里蜿蜒多姿其末也猶奇
峰特起前人建寺其中以表山川之穎但規模褊隘歲
久頽殘迨萬曆壬子仲夏僉議興建捐資趨事遂拓故
址庀良材建三寶殿於中觀音閣於後前大門三開僧
廚備焉厥位面庚沂流而向園池錯布松竹鬱森儼然
一祇林之天設戊午秋梧城火予寓居此得環觀其槩
緣首□□等請記其事予思天地閒即拳石之大亦藏
其無窮始以長洲一鯁鱗耳安知其鱗甲聳峙有如此
者人物懿蔚不虛也建寶刹以輝映其閒山靈生色眾
善人天之福端在是矣予能斬一言之揚詡乎雖然莫
為之後雖盛弗備倘再於座側為南向避暑之所於後
山開登臨覽勝之境則此寺之光景益無窮予且於他
日樂觀其勝焉是有望於大方之君子也前殿并大
門捐資姓名悉題於石觀音閣別有任之者則不贅

國朝康熙閒修邑人李世瑞置業
雍正十三年華嚴寺香燈
記長洲尾有牛眠山形肖

蒼梧縣志

卷之八

建置志

佛寺

三

而地靈明初建華嚴寺於其首以奉佛為裏水兩岸祝
釐之所並為俊秀習讀之區時稱庶富月米香供用之
不竭僧以業糧為累洲人亦莫之計明末闖賊為災洲
尾特甚人民宅舍十僅存二荒涼滿目今雖元氣稍復
豈能如前有寺無業誠為可嘆世瑞見係祖居崇奉之
所欲撥業祀之又遠不便管適康熙庚子有陳尙進獻
寺西二里土名小灣地一段門樓塘四口魚埠一泊共
成一畝上八甲立華嚴寺戶收載便僧輸納余男淳見
政一畝上八甲立華嚴寺戶收載便僧輸納余男淳見
僧用不敷自戊申至乙卯用銀一百六十一兩共七契
大窩村土名都令田五邱大滙田一邱秧脚田五邱橫
埔田十邱塘犁田七邱荒桿田一邱埔口弟幼田全源
寺前寺門塘一連三口了人塘一口上下地二塊魚埠
一泊共糧二石四斗八升八合一併收入華嚴寺戶蓋
載嗣後神之香燈有餘僧之衣
食亦足可為蒼梧之名寺是為記
嘉慶閒重修

與福寺在長洲尾明建萬曆閒知府陳鑑設社學於此天
啟五年邑人顏國鸞置業康熙閒邑人李世瑞置業

觀音堂一在戎墟

祁山寺在長洲頭

彌勒寺在長洲平埔

泗洲寺在泗化洲

東華菴城西二十里平政鄉大宕村高山中三峰列峙四
畔長林古木蒼翠欲滴左有流泉築隄作池清可鑑物
明崇禎閒寡婦張氏始創是菴併爲置業相傳當時住
持僧募銅鑄佛適遇老媪采樵者佈施一錢僧以其少
而褻棄之池及治時爐中銅皆躍僧悔悟復索錢於池
得之爲置之爐像乃成今錢形宛然貼左肩上摹藏衣

蒼梧縣志

卷之八

建置志

佛寺

三

帶閒可止嬰兒夜啼云

慶德寺在戎墟下郭

七寺在戎墟東南隅

磐石菴在戎墟下小河舊名盤龍

觀音堂在戎墟無患山前創建無考康熙五年始得佛像
於頽垣中作堂僅蔽風雨四十二年僧戒宏挂錫其地
募眾葺而新之前後堂皆三楹雍正十三年重修

西山寺在多賢鄉頭堡下郢市

馬頭菴在多賢鄉三堡

萬壽寺在多賢鄉三堡沙村

福惠寺在多賢鄉三堡思龍村

倒水寺在平政鄉桂江南岸

金山寺在吉陽鄉河步

懷義菴在冠蓋鄉四甲

寶城寺在冠蓋鄉大陂山

古邑寺在平樂鄉中堡

蓮池寺在須羅鄉新利墟

寶珠寺在長行鄉上二堡廣平墟

舊名太戶菴

迴龍菴在長行上二堡黃陂村

百合寺在安平鄉嶺脚明萬厯開設社學

蒼梧縣志

卷之八

建置志

佛寺

寺

興賢寺在安平鄉平琴村

寶林寺在安平鄉

福緣寺在潯陽鄉

石塔寺在東安鄉十寨堡

東山寺在東安鄉下堡

附 奎光塔在城東光孝寺明萬厯十九年鎮守監陳瑄建

舊志 高九層頂備九霄銅鈴簷馬製極精巧嘉慶開市

人積薪其旁不戒於火焚三晝夜金鐵剝落至咸豐開

頽圯值江水泛溢居民移徙幸不傷人今已無存

采訪

允升塔在城南隔江錦屏山形家呼為文筆高七層道

光二年邑人請建時當路恐不利於郡城未許也越明年春鬱林刺史恆梧權守是邦始諭於紳士購材而建焉又明年成梧之四民無所不利四年時總督阮元巡視西粵始入境從繫龍洲遙望而喜曰是天然之秀也雲山鬱蒸江水澄凝得此高塔勢欲上騰梧岡吉士從此其興遂名之曰允升而題其額曰梧江發秀
觀光塔在大江南岸鐵頂道光四年南五鄉建
吉光塔在吉陽鄉古隴河山壘乾隆閒鄉人建今半毀
同上

